



12. august 2011

UKA 2011/29

12. januar 2011

UPA 2011/68

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

**Kalaallit Nunatsinni pisortatigoortumik Nunatta Katersugaasivianut Allagaateqarfianullu atasussamik kulturikkut eriagisariaqartut illersorneqarsinnaasumik toqqorsiveqalernissaanut Naalakkersuisut pilersitsinissamut suliaqaqqullugit Inatsisartut aaliangiiffigisassaattut siunnersuut.**

(Inatsisartunut ilaasorta, Aleqa Hammond Siumut)

**Tunnqavilersuut:**

Nunarput tamakkerlugu katersugaasivinni toqqortarineqarput pigineqarlutillu kulturitsinnut pingaarutillit eriagisariaqartullu amerlaqisut, pigisat piffissaq ungasinnerusoq isigalugu pitsaannerusumik toqqorsinni inissinneqanngikkunik annaaneqarsinnaasut pitsaassutsimikkullu annertuumik innarlerneqarsinnaasut. Taamatut aamma ippoq Nunatta Katersugaasiviani Allagaateqarfianilu toqqortarineqartut ataatsimullu isigalugu pigisat inuiaassuttitta erlinnartuutaanik taaneqartariaqartut.

Maanna Nunatta Katersugaasiviani Allagaateqarfianilu inissaq toqqorsivigineqarsinnaasoq annikitsigaaq allatut ajornartumik Nuummi illoqarfimmi sumi tamaani assigiinngitsuni toqqorsiveqartitertoqarluni. Tamanna siunissaq ungasinnerusoq isigalugu toqqortanut eriagisariaqartunut annertuumik pitsaassutsikkut innarliinermik kinguneqartussaavoq.

Kulturikkut eriagisariaqakkat amerlasuutigit silaannaap kissassutaanik, nillissutaanik assigisaanillu aaliangersimasumik aqunneqartumik toqqorsimasussaapput passunneqartariaqarlutillu, taamaasiortoqanngippallu eriagisariaqartut asiusinnaallutik.

Pineqartut tassaapput itsarnisarsiornikkut assaanermit nassaarineqarsimasut ukiorpassuarnilu innarlerneqanngitsumik nunap pissusaanit eriagineqarsimasut paarilluarneqanngikkunik aammalu tulluurtumik ikuallassinnaanngitsumillu eriagisarialittut passunneqanngikkunik asiusinnaasut.

Nunatsinni pisortatigoortumik namminerisamik immikkut illersorneqarsinnaasumik pitsaasumillu toqqorsivittaarnikkut nunarput periarfississuaa ukiorpassuarni nunatta kulturikkut eriagisarialittut nalunaarsorsimasuutai aammalu assaasarsimanermit inuit saarngi ukiuni 100-ni assaasarsimanermit nalunaarsorneqarsimasut eriagisariaqartullu maanna Danmarkimiittut Panum Institutimi København Universitetimiittumi uninngasuutigineqartut nunatsinnut utertinneqarsinnaalerneru.

Nunatta aammalu Danmarkip akornanni Utimut-isumaqatigiissummi 1999-imi isumaqatigiissutigineqarpoq nunatsinni itsarnisarsiornermi assaasarsimanermit inuit saarngisa nassaariortorneqarsimasunut nunarput piginnittussaasoq aammalu maanna nassaarineqarsimasut tamarmik nunatsinnut utertinneqartussanngortut, tamannalu piviusunngorsinnaavoq illersorneqarsinnaasumik aammalu eriagisassanut tulluurtumik toqqorsiveqalernikkut pilersitsinikkut.

Neriutigaara partiit tamarmiusut nunatta pisuussutai eriagisariaqartut nunatsinnut utertinneqarnissaannut siunissamilu pitsaanerpaamik paaqqutarineqarsinnaalersinnissaannut aqcutissiuusseqataajumaartut aaliangiiffigisassatullu siunnersuutigisara kultureqarnermut ataatsimiititaliamut ingerlatikkumaarlugu, kingusinnerusukkullu maani inersuarmi akuersissutigiumaarlugu.

### **Siunnersuutip aningaasatigut kingunissai**

Ajornakusoorpoq eqqoqqissaartumik toqqorsivittaarnissaq pillugu siun-nersuuteqarnermi pilersitsinissaq pillugu maanna killiffimmi aningaasartassaata angissusilernissaa, taamaattorli naapertuussoraara kultuurikkut eriagisariaqartut toqqorsiveqalernissaannut aningaasaliineq pisortat sanaartortitsinermit aningaasaliisernerannit tulleriarinermi nassaarineqassasut. Kultoorikkut eriagisariaqartut illersorneqarnissaat pisortat pisussaaffigaat.

Ilutigitillugu aningaasartuutsisanut angissusiliinermit ataani taaneqartut apeqqutaasapput:

1. Pilersinneqarnissaannut periusissaq
  - a. Nutaamik pilersitsisoqassava?
  - b. Illuutit maanna atorineqartut allannngortillugit sanaartorneqasappat immaqaluunniit allineqassappat?
  - c. Toqqorsiveqalernissamut piunasaqaatit suut atuutinneqassappat?
  - d. Sanaartorneqarluni naammassippat ingerlatsinermit aningaasartuutit makkununga:
    - i. Sarfaq, imeq kiassarnerlui
    - ii. Pequtilersorneqarnera
    - iii. Eqqiaaneq
    - iv. Nutaanik sulisussanik atorfinitsitsineq

### **Siunnersuutip akuerineqarneratigut allaffissornikkut kingunissai assigiinnigitsunik tunngaveqarlutik sunnuteqassapput.**

Siunnersuutip akuerineqarnera allaffissornikkut nutaanik pilersitsinermit kinguneqassanersoq immaaluunnit allaffissornikkut pioreersunik alliliinermit kinguneqassanersoq suliasap annertussusaa apeqqutaajumaarpoq. Siunnersuutip akuerineqarnerata kinguneranik pilersaarutip inarsarneqarnerata ilanngullugit qulaani taaneqartut allaaffissornikkut aningaasarsionikkullu kingunissai ilanngullugit allaaserineqassapput.

### **Siunnersuutip suliffeqarfinnut namminesortunut kingunissai**

1. suliffeqarfimmu/nnut suliasaq nutaaq
2. suliffeqarfimmu/nnut sulairinnittussarsiuinermit ajugaasumut/nut isertitassat
3. sulinermit inuussutissasriuteqartunut suliasanut sulisorineqalersussanut suliasaq
4. sulisunik nutaani atorfinitsitsinermit kinguneqarsinnaavoq.